



100

pelajar semarakkan semangat sukarelawan

Semangat sukarelawan di kalangan mahasiswa akan mewujudkan rasa kebersamaan (*esprit de corps*) yang kukuh dalam mengeratkan perpaduan bangsa dan komitmen kepada negara.

Justeru, sebagai menyemarakkan rasa kebertanggungjawaban ini Pusat Bahasa Moden & Sains Kemanusiaan Universiti Malaysia Pahang (UMP) menganjurkan Program Khidmat Masyarakat & Pendidikan selama empat hari di kampung Tekek, Kampung Paya dan Kampung Genting, Pulau Tioman baru-baru ini.

Penganjuran program ini dibuat bersempena penglibatan pelajar UMP sebagai sukarelawan dalam menjayakan program Sultan Ahmad Shah International Eco-Challenge 2010 (SASTIEC 2010)

Menurut Naib Canselor UMP, Profesor Dato' Dr. Daing Nasir Ibrahim berkata penglibatan dalam aktiviti kesukarelawan (*volunteerism*) membantu dalam pembangunan kerjaya mahasiswa pada masa hadapan.

"Kelasakan dan ketahanan mahasiswa turut dipengaruhi oleh keikhlasan dan kesukarelaan sebagai pemimpin generasi akan datang.

Beliau mengharapkan agar mahasiswa universiti dapat mencapai satu tahap yang lebih tinggi, merentasi sempadan dan mengungguli agenda kemanusiaan hingga ke peringkat antarabangsa.

Katanya, antara yang boleh dijalankan meliputi program perlindungan haiwan, konservasi alam sekitar, bantuan bencana, advokasi kesejahteraan kanak-kanak, wanita dan orang tua serta kaunseling komuniti.

Sementara itu, Dekan Pusat Bahasa Moden & Sains Kemanusiaan (PBMSK) UMP, Profesor Dr. Abd Jalil Borham berkata, peserta sukarelawan mengambil inisiatif membersihkan kampung dan pesisiran pantai agar pengunjung terutamanya pelancong luar negara dapat menikmati keindahan ketika berkunjung di Pulau Tioman yang merupakan destinasi pelancongan terkemuka dunia.

"Mahasiswa yang cemerlang bukan saja berjaya memperoleh keputusan peperiksaan yang baik tetapi turut serta dalam aktiviti kampus bagi membolehkan mereka mencurahkan bakti kepada masyarakat sekitar yang serba kekurangan.

Sebagai tanda prihatin mahasiswa kepada masyarakat setempat, seramai sepuluh penduduk kampung Tekek yang kurang bernasib baik menerima sumbangan berbentuk makanan dan keperluan harian sempena program sukarelawan berkenaan.

Seorang penerima sumbangan, Mat Siah Mak Walau, 80, berkata, beliau bersyukur atas keperhatian dan sumbangan ini yang sedikit sebanyak akan meringankan bebanan mereka sekeluarga.

Sementara itu, seorang pelajar dari SMK Tekek, Nabela Tajul Arus, 15, berkata program sebegini amat menyeronokkan dan merupakan penyertaan sulung beliau.

Program motivasi turut mendapat sambutan yang menggalakkan dengan penyertaan seramai 100 pelajar sekolah dari pelbagai peringkat pendidikan dari Kampung Tekek.

Penganjuran Program Khidmat Masyarakat & Pendidikan ini mendekati mahasiswa UMP dengan masyarakat setempat selaras dengan gagasan 1Malaysia yang disaran oleh Perdana Menteri Malaysia.

